

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Siunnersuutip saqqummiunneqartup siunertaraa Nuup kiisalu Qasigiannnguit Aasiaallu pilersorneqarnerannut erngup nukinganik nukissiorfinnik taakkunungalu atatillugu atortunik sanaartornermut, aningaasalersuinnermut ingerlatsinermullu killiliussatut atugassarititaasut pillugit Inatsisartut inatsisaanni (sanaartornissamut inatsit) ilaasunik erngup nukinganik nukissiorfiliornissat aningaasaliiffiginissaannut pitsaanerpaamik aningaasaqarnikkut atugassarititaasut annertusineqarnissaat isumaqatigiissuteqarsinnaanissarluk. Sanaartornissamut inatsit erngup nukinganik nukissiorfiliornissamut aningaasaliinnermut atugassanut akiitsut annerpaamik katillugit 3,1 mia. kr.-nut taarsigassarsinissamut Naalakkersuisunut pisinnaatitsivoq.

Siunnersuummi periarfissinneqarput:

- Sanaartornissamut suliniutinut aningaasaliinissamut pisariaqartinneqartut matussusernissaat Danmarkip naalagaaffianit immaqalu aningaasarsitugalugu taarsigassarsititsisartuni avataanit aningaasaliisartunit taarsigassarsinikkut aningaasaliissuteqarnikkut.
- Naalakkersuisut taarsigassarsinnaassasoq Nukissiorfinnut imaluunniit Namminersorlutik Oqartussat aktieselskabiinut taarsigassarsiarisinnaasaminnik.
- Sanaartornissamut inatsimmi ilaasut erngup nukinganik nukissiorfinnut sanaartukkat, aningaasaliinerit ingerlatsinerillu Namminersorlutik Oqartussat tamakkiisumik ilaannakortumilluunniit aktieselskabiutaannut tunniunneqarsinnaassasut.
- Nukissiorfinnut imaluunniit Namminersorlutik Oqartussat tamakkiisumik ilaannakortumilluunniit aktieselskabiutaannut naalagaaffimmit taarsigassarsitseqqiinissamut isumaqatiginninniarlunilu isumaqatigiissuteqarsinnaaneq.

2. Siunnersuummi immikkoortut pingaarnertit

2.1.1. Pisinnaatitaaffik atuuttoq

Inatsimmi atuuttumi (sanaartornissamut inatsit) § 5 imm. 1-imi aamma 2-mi aalajangersarneqarpoq, Naalakkersuisut annerpaamik katillugit 3,1 mia. kr. DKK-nik akiitsoqalerlutik taarsigassarsinnaasut aamma Naalakkersuisut imm. 1 naapertorlugu taarsigassarsiatik Nukissiorfinnut taarsigassarsiariteqqissinnaavaat inatsimmi ilaasunik sanaartornissanut suliniutit aningaasalersornissaannut. Sanaartornissamut inatsit landskarsip taarsigassarsiaanik Namminersorlutik Oqartussat aktieselskabiutaanut taarsigassarsitseqqiinissamut pisinnaatitsinermik imaqanngilaq, aalajangersakkami Nukissiorfiit Namminersorlutik Oqartussanit namminersortitatut aaqqissuussaasoq

taamaallaat taaneqarsimammat. Nukissiorfiit landskarsi avaqqullugu sanaartornissamut aningaasaliissutissanut namminneerlutik taarsigassarsinnaanngillat. Aalajangersakkap tamatuma ingerlaqqittumillu malitsigisaani naalagaaffimmit taarsigassarsinermut inatsit naapertorlugu naalagaaffimmit taarsigassarsianik Nukissiorfimmuut taarsigassarsititseqqiisoqarsinnaanngilaq.

Sanaartornissamut inatsimmi § 6-imi aalajangersakkami aalajangerneqarpoq Naalakkersuisut sanaartornissamut, aningaasaliinermut ingerlatsinermullu namminersortumik ataatsimik arlalinnilluunniit isumaqatigiissuteqarsinnaasut. Aalajangersakkami tassani BOT-mik isumaqatigiissuteqarsinnaaneq periarfissaqartinneqarpoq. BOT-mik isumaqatigiissutip nassatarisaanik Namminersorlutik Oqartussat erngup nukinganik nukissiorfinnik atortuinillu aningaasaliinermut, pilersitsinermut ingerlatsinermullu avataani aningaasaliisartunik isumaqatigiissuteqarsinnaapput kiisalu Namminersorlutik Oqartussanut taakkuninnga piffissami aalajangerneqarsimasumi tunniussineq pillugu. Isumaqatigiissuteqarnermi erngup nukinganik nukissiorfinnik pilersitsinermut ingerlatsinermullu atatillugu piffissami aalajangerneqartumi navianaateqarsinnaasunut avataanit aningaasaliisut akisussaaffimmik tiguseqataassapput piginneqataallutillu, ilutigitilluguli aningaasaliisoq missingersuutunik qaangiinerni ingerlatsinermilu navianaateqarsinnaasunik tigusinikkut iluanaaruteqarnissaq naatsorsuutigisinnaassallugu.

2.1.2. Siunnersuut

Inatsisissatut siunnersuummi Naalakkersuisut aningaasalersuinissaq pillugu Naalagaaffimmik isumaqatiginninniarnissamut annertusisamik pisinnaatinneqassapput, tassuunakkut Nukissiorfinnut imaluunniit Namminersorlutik Oqartussat selskabiutaannut sanaartornissamut aningaasaliinissamut il.il. Naalagaaffiup taarsigassarsititseqqiisinnalarnissaanut tunngavissamik aqqutissarsiusallutik. Naalagaaffimmit taarsigassarsititseqqiineq aningaasarsiutigalugu taarsigassarsititsisartunut sanilliullugit qularnanngilluinnartumik appasinnerusumik ernialerlugu pisinnaassaaq.

Naalakkersuisut Danmarkimi Finansministeriamut saaffiginnissuteqarpoq naalagaaffimmit taarsigassarsinissaq pillugu oqaloqatigiinnissaq siunertaralugu. Ulloq 14. marsi 2022 qanoq pilersaaruteqarnermik nalunaaruteqartoqarpoq, tassani Danmarkimi naalakkersuisut Naalakkersuisullu isumaqatigiissutigalugu Finansministeriamit Aningaasaqarnermullu Naalakkersuisoqarfirmmit ataatsimut paasiniarneqassasoq Kalaallit Nunaanni erngup nukinganik nukissiorinissamik suliniutinut aalajangersimasunut aningaasaliinermut atatillugu Danmarkip peqataasinnanera - taamaassinnaappallu qanoq - misissuiffigineqassasoq.

Naalagaaffik taarsigassarsititseqqiisinnaavoq - imaappoq finansministeriap taarsigassarsiai kingorna naalagaaffiup suliffeqarfiutaanut selskabiutaanullu il.il. taarsigassarsiariteqqinneqartunik – naalagaaffiup taarsigassarsinissamut pisinnaatinneqarnera pillugu inatsit nr. 1079, 22. december 1993-imeersumi kingornalu allannguuteqartumi (naalagaaffimmit taarsigassarsineq pillugu inatsit) aamma naalagaaffiup suliffeqarfiutai ataasiakkaat selskabiutaalu il.il. pillugit immikkut inatsimmi pisinnaatinneqartunik.

Naalagaaffiup naalagaaffimmi selskabinut il.il. taarsigassarsititseqqiinermi tamatumunnga piunasaqaatit pillugit isumaqatigiissuteqartoqarsimanissaa piunasaqaataavoq. Aningaasaliinissamut isumaqatigiissuteqarnissamik aalajangiineq aningaasaliinermut aningaasaliussanullu pilersaarutit taarsigassarsisumit suliarineqartunik kingornalu naalagaaffimmit akuerineqartunik tunngaveqassaaq. Nukissiorfiit imaluunniit

Namminersorlutik Oqartussat selskabiutaat pilersaarummi akuerineqartumi najoqqutassiat tunngavigalugit taarsigassarsissapput.

Aningaasaliinermut pilersaarut katillugit aningaasaliiffigineqarnissamik pisariaqartinneqartunik sanaartornissamut inatsimmi ilanngunneqartunik ilaqassaaq. Aningaasaliinissamut aningaasalersuinissamullu pilersaarummik ukiumoortumik akuersinermut atatillugu taarsigassarsiat qanoq annertutigisut naalagaaffimmit taarsigassarsiarineqarnissaannik qinnuteqartoqarnissaanik tamatumanilu taarsersuinissamik isummertoqarsimanissaanik piumasaqaatitaqarpoq. Tamatumunnga atatillugu suliffeqarfiup naalagaaffimmit taarsigassarsinissamut atugassarititaasut aalajangersarneqassapput. Naalagaaffimmit taarsigassarsinermut piumasaqaataavoq ataavartumik erniaqarlutillu akilersorneqassasut. Taarsigassarsianut erniat ilaatigut taarsigassarsiat akilersornissaannut piffissaliussamut taarsersuinerullu isikkuanut takussutissaassapput, taarsigassarsiat **akilersorneqarsinnaanngimmata** naalagaaffiup taarsigassarsinermi atugassarititaasunit pitsaanerusumik atugassaqaartoqarsinnaanngimmat.

Sanaartornissamut inatsit naapertorlugu sanaartornissat aningaasalersorneqarnissaannut Nukissiorfinnut imaluunniit Namminersorlutik Oqartussat selskabiutaannut naalagaaffimmit taarsigassarsiteqqinneqarnissamik isumaqatiginninniarnilunilu isumaqatigiissuteqarsinnaassagaanni naalagaaffimmit taarsigassarsineq pillugu inatsimmi taarsigassarsitseqqiinermut piumasaqaatinik naammassinnittunik atugassarititaasunik piumasaqaatinillu isumaqatiginninniarnissaq pisariaqassaaq. Siunnersuummi pisinnaatitsissummik ilanngussisoqarpoq Naalakkersuisut siunertamut tassunga sanaartornissamut suliniutip aqqiussuusaanerani inatsisitigullu atugassarititaasunik nalimmassaanissamut pisinnaatinneqassallutik, tamatumunnga ilanngullugu Namminersorlutik Oqartussat tamakkiisumik ilaannakortumilluunniit aktieselskabiutaanut suliassanik sanaartornissamut inatsimmi ilaatinneqartunik tamatumunngalu atatillugu aningaasartuutunik tunniussisoqassanersoq.

Sanaartornissamut suliassanut sanaartornissamut inatsimmi ilaatinneqartunut aningaasaliinermi isumaqatiginninniarni taarsigassarsinermilu piumasaqaatinik aalajangiinerni pissutsit arlallit Naalagaaffimmit avataaniillu taarsigassarsititsisumit allamit pingaartinneqassapput. Taamaalluni aningaasaliissusap naliliineranut ilaatigut sunniteqarsimavoq erngup nukinganik nukissiorfimmi suliat Nukissiorfiup suliaanit allanit avissaartinneqarsinnaanersut, taarsigassarsinermi pigisat qularnaveequtigineqarsinnaanersut, Namminersorlutik Oqartussat aktieselskabiutaannut inatsisitigut atugassarititaasut aamma selskabip aningaasanngorlugu nalinga. Aningaasaliinerup naalagaaffimmit taarsigassarsinikkut aningaasalersuinerillu allat atorlugit pissarsiarineqarsimanerat taarsigassarsiisumut aamma isumaqarsinnaavoq.

Inatsisissatut siunnersuummi Naalakkersuisut pisinnaatinneqassapput piumasaqaatit tunngaviusut arlaqartut aqqiissuteqarfiginissaannut saaffiginninnissamut isumaqatiginninniarnissamullu, tamatumunnga ilanngullugu qulaani taaneqartutut sapinngisamik pitsaanerpaamik atugassaqaarluni taarsigassarsinnaanissamut.

3. Pisortanut aningaasaqarnikkut allaffissornikkullu kingunerisassai

Siunnersuut tunngaviusumik aningaasaqarnikkut naatsorsuutitut sanaartornissamut inatsimmi tunngavigineqartunut allannguaviannngilaq, siunnersuullu taamaallaat sanaartornissami suliassat aningaasalersorneqarnissaannut isumaqatiginninniarnissamut isumaqatigiissuteqarnissamullu annertusisamik atugassaqaartitsissaaq aamma siunnersuut

taamaallaat naalagaaffimmit taarsigassarsititseqqiinermut aningaasaliiffinniillu allanit taarsigassarsinermi piumasaqaatit naapertorlugit sanaatornissamut suliaassanut aningaasaliinissamut isumaqatigininniarnernut isumaqatigiissuteqarnissanullu annertusisamik atugassaqaarnissamik nassataqarluni. Siunnersuut taamaammat pisortani aningaasaqaarnikkut allaffissornikkullu kinguneqarnaviannngilaq.

4. Inuussutissarsiortunut aningaasaqaarnikkut allaffissornikkullu kingunerisassai
Siunnersuut inuussutissarsiortunut kingunerisassaqaanngilaq.

5. Avatangiisinut, pinngortitamut inuillu peqqissusaannut kingunerisassai
Siunnersuut avatangiisinut, pinngortitamut imaluunniit inuit peqqissusaannut kingunerisassaqaanngilaq.

6. Innuttaasunut kingunerisassai
Siunnersuut innuttaasunut aningaasaqaarnikkut imaluunniit allaffissornikkut kingunerisassaqaanngilaq.

7. Allatigut kingunerisassai pingaaruteqartut
Siunnersuut allatigut pingaaruteqartunik kingunerisassaqaanngilaq.

8. Oqartussaasunut soqutigisaqaqatigiiffinnullu il.il. tusarniaaneq
Siunnersuut piffissami 2022-mi 6. juli-mit 3. august-mut tusarniutigineqarpoq.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut.

Aalajangersagaq Nukissiorfinnut imaluunniit Namminersorlutik Oqartussat aktieselskabiutaanut sanaatornissamut suliniutinut aningaasartuutinullu sanaatornissamut inatsimmiittunut landskarsip taarsigassarsiaanik taarsigassarsititseqqinnissamut Naalakkersuisunut pisinnaatitsivoq. Aalajangersakkap sanaatornissamut inatsimmi § 5-imi aalajangersagaq atuuttoq ingerlateqqippaa § 5 imm. 2-mi imaattumik allannguuteqarluni Naalakkersuisut Namminersorlutik Oqartussat aktieselskabiutaannut taarsigassarsititseqqiisinnaassasut.

Landskarsip taarsigassarsiai missingersuutinut inatsimmi § 6-imi atugassarititaasut naapertorlugit pissaaq. Nalilerneqarpoq sanaatornissamut inatsisip ilaatut sanaatornissamik suliniutinik tamakkiisumik aningaasalersuinissamut Namminersorlutik Oqartussat aktieselskabiutaannut taarsigassarsineq missingersuutinut inatsimmi § 6-imi piumasaqaatinik Inatsisartut inatsisaanni atuuttumi oqaaseqaatini itinerusumik nassuiarneqarsimasunik naammassinnissasoq.

Nr. 2-mut.

§ 6-imi aalajangersagaq atuuttoq atorunnaarsinneqassaaq. § 6-imi atuuttumi aalajangersakkap Naalakkersuisut sanaartukkanik sanaatornissamut inatsimmi ilaatinneqartunik sanaatornissamik, aningaasaliinermik ingerlatsinermillu namminersortumik ataatsimik arlalinnilluunniit BOT-mik isumaqatigiissuteqarnissamik pisinnaatippaa. BOT-imik isumaqatigiissuteqarneq aningaasaqaarnikkut pitsaannginnerusutut nalilerneqarpoq BOT-imillu

suliarinnittussarsiorneq erngup nukinganik nukissiorfiliornissap kinguartinneqaratarsinnaaneraniq nassataqarsinnaalluni. Taakku tunngavigalugit aalajangersakkap atuuttup atorunnaarsinneqarnissaa siunnersuutigineqarpoq.

(§ 6 imm. 1-imut)

Aalajangersakkatut siunnersuutigineqartoq Naalakkersuisut suliassat §§ 2-4-mi ilaatinneqartut aningaasartuutillu taakkununga attuumassuteqartut Namminersorlutik Oqartussat tamakkiisumik ilaannakortumilluunniit aktieselskabiutaannut tunniunneqarnissaannik aalajangiisinnaatippaat. Pisinnaatitsineq naalagaaffimmit taarsigassarsititseqqiinnermi atugassarititaasut pillugit isumaqatiginninniarnernut imaluunniit taarsigassarsititsisunik allanik isumaqatiginninniarnernut atatillugu atuutissaaq. Naalakkersuisut atuuffik tamanna Namminersorlutik Oqartussat aktieselskabiisa ukiumoortumik ataatsimeersuarneranni atussavaat Naalakkersuisullu atuuffimminnut tassunga atatillugu selskabip aaqquissuusaanikkut atugassarititaanut aalajangiisinnaassapput, tamatumunnga ilanngullugit sanaartornissamut inatsisip siunertaanik naammassinninnissamut inatsillu naapertorlugu sanaartornissamik suliniutit aningaasalersornissaannut taarsigassarsinissamut piumasaqaatinik naammassinnissinnaasunik ileqqoreqqusanik, aqutsinermik il.il, aalajangersaanermi.

(§ 6 imm. 2-imut)

Siunnersuutigineqarpoq Naalakkersuisut Namminersorlutik Oqartussat aktieselskabiutaanni, sanaartornissamut inatsit naapertorlugu erngup nukinganik nukissiorfinnik sanaartornermut, aningaasaliinermut ingerlatsinermillu suliassanik tunineqartunut, aningaasaatit pillugit isumaqatigiissuteqarnissamut imaluunniit aningaasatilluunniit amerlinissaannut pisinnaatinneqassasut. Aningaasaatit amerlineqarnerat nalilinnik erngup nukinganik nukissiorfiit pigisaanik tunniussinikkut imaluunniit aningaasanik piginneqatigiissutinik tunniussinikkut aningaasanilluunniit taarsigassarsititsinikkut pisinnaavoq. Selskabip aningaasaataasa annertussusaannik aalajangersaaneq katiterinerlu taarsigassarsitinneqarnermi piumasaqaatinut aalajangiisuussapput, pissutsillu taakku taarsigassarsititsisunik isumaqatiginninniarnermi isumaqatiginninniutigineqassallutik, naalagaaffimmit taarsigassarsititseqqiineruppat avataaniilluunniit taarsigassarsititsisartunit taarsigassarsineruppat.

(§ 6 imm. 3-imut)

Siunnersuutigineqarpoq Naalakkersuisut Namminersorlutik Oqartussat aktieselskabiutaanni taarsigassarsianut qularnaveeqqusiisinnaanermik pisinnaatinneqassasut. Namminersorlutik Oqartussat selskabiutigisat taarsigassarsiaannut qularnaveeqqusiinnginnissamik tunngavik ukiorpassuarni aalajangiusimavaat. Illersorneqarsinnaasumik ingerlatsinerup qulakkeerneqarnissaanik selskabini siulersuisut ukkataqarnissaat tamatumani qulakkeerniarneqarsimavoq, tamatumunnga ilanngullugu aktieselskabit pillugit inatsit naapertorlugu ilaatigut pilersaarutit, missingersuutit assigisaallu malitseqartinneqartarnissaa, kiisalu selskabit akiliisinnaassuseqarnerat, pisiniarluni inniminniinerit, pingaarnertut aalajangiinerit, sillimmasiisarfinni atugassarititaasut tamakkiisut, aningaasaqarnikkut

atugassarititaasut, aningaasat ingerlaarnerat immikkullu navianaateqartut pillugit nalunaarusiat isummerfigineqarlutik.

Namminersorlutik Oqartussat avataanit taarsigassarsititsisartunit Namminersorlutik Oqartussat aktieselskabiutaannut taarsigassarsianut qularnaveeqqusiinerat taarsigassarsititsisartut piumasaqaatinik isumaqatiginninniarnerni ilaatinneqarsinnaavoq.

Erngup nukinganik nukissiorfinnik pineqartunik sanaartorneq nunap soqutigisaanut qanorluunniit tunngaviusorujussuussapput, suliniutillu aningaasaqarnikkut kipusuussappata Namminersorlutik Oqartussat akisussaatinneqarnissaat naatsorsuutigineqarsinnaassalluni.

§ 2-mut

Aalajangersakkami siunnersuutip ulloq atuutilerfissaa allassimavoq. Inatsisartut inatsisaanik allannguutip ulloq 1. decembari 2022 atuutilernejarnissaa siunnersuutigineqarpoq.

ILANNGUSSAQ 1

Inatsisissatut siunnersuut inatsimmut atuuttumut sanilliullugu	
<i>Oqaasertat atuuttut</i>	<i>Inatsisissamut siunnersuut</i>
	§ 1 Nuup kiisalu Qasigiannuguit Aasiaallu pilersorneqarnerannut erngup nukinganik nukissiorfinnik taakkunungalu atatillugu atortunik sanaartornermut, aningaasalersuinnermut ingerlatsinermullu killiliussatut atugassarititaasut pillugit Inatsisartut inatsisaat nr. 22, 1. december 2021-meersumi tulliuttut allanngortinneqassapput:
§ 5, imm. 2: ”Naalakkersuisut taarsigassarsiatut aningaasaliissutissat imm. 1 naapertorlugu Nukissiorfiit taarsigassarsiteqqissinnaavaat, inatsit naapertorlugu sanaartugassat aningaasalersorneqarnissaannut atatillugu.”	1. § 5, imm. 2, imannak oqaasertalerneqassaaq: ”Naalakkersuisut taarsigassarsiatut aningaasaliissutissanut imm. 1 naapertorlugu Nukissiorfinnut imaluunniit Namminersorlutik Oqartussat suliffeqarfiutaannut taarsigassarsititseqqissinnaapput inatsimmi ilaatinneqartunut sanaartornermut aningaasalersuinnermut § 6 naapertorlugu.”
§ 6. ”Naalakkersuisut pisinnaatitaapput sanaartornermut, aningaasalersuinnermut aamma ingerlatsinermut iluaqutissartaqarpat namminersortumut imaluunniit namminersortunut arlaqartunut isumaqatigiissuteqarsinnaanermut sanaartornermut, aningaasalersuinnermut aamma ingerlatsinermut sanaartukkanut tunngatillugu, aammalu piffissap ersarinnerusumik aalajangersarneqartup iluani erngup nukinganik iluaquteqarluni nukissiorfiit atortulersuutitaat ilanngullugit Naalakkersuisunut tunniunneqarsimanissaannik.”	2. § 6 imannak oqaasertalerneqassaaq: ” Naalakkersuisut aalajangersinnaavaat, suliassat §§ 2-4-mi ilaatinneqartut aningaasartuutillu taakkununga attuumassuteqartut tamakkiisumik ilaannakortumilluunniit Namminersorlutik Oqartussat suliffeqarfiutaannut tunniunneqassasut. Imm. 2. Aningaasaliisnaatitaanermut malittarisassat atuuttut naapertorlugit Namminersorlutik Oqartussat imm. 1 naapertorlugu ingerlatseqatigiiffimmi aktianut aningaasaliinissamik taarsigassarsiallu akisussaaffiginissaannut Naalakkersuisut avataani taarsigassarsititsisartunut pituttuisumik nalunaaruteqarsinnaapput. ”
	§ 2 Inatsisartut inatsisaat una atortuulissaaq ulloq 1. decembari 2022.